



Gotzbertus illustri familia Francorum natus fuit. Vnde dux Franciæ Orientalis existens magna laude, nomine Theodorici regis Francorum, eam Germaniæ partem administrabat. erat enim magna animi & corporis fortitudine præditus. Cum autem ijs in locis maiorum suorum traditiones obseruarent, atque idolorum cultum custodirēt, factum est ut Gotzbertus Gaylanam fratris sui defuncti uxorem apud se haberet, atq; ipsius consuetudine frueretur. Accidit ergo cum S. Kilianus Dei benignitate ad ea loca ueniret, atq; Christi Euāgelium prædicaret, ut Gotzbertus auidè eius doctrinam audiret & susciperet. Inter a-

lia uerò S. Kilianus ducem increpat, atque ei ostendit, nequaquam Christianis licere fratrum uxores sibi coniungere. Vnde Gotzbertus ei promisit, sese occasione oblata ipsi obtemperaturum. Id cum Geylana percepisset, ira comota in principis absentia fecit, ut Sanctus Kilianus tolleretur. Verùm cum Gotzbertus uera religione ductus in suo proposito pergeret, etiam ipse Herbipolis impiè à suis ministris interficitur. Huius filius Hetanus patri quàm similimus in ducatu successit, atq; Christianam religionem professus, eandem suis subditis proposuit, & contra impios fortiter defendit. Claruit Gotzbertus circa annum Domini 680. Anon.